

Morning Dogri (NSD) National News Bulletin 01-08-2024

आकाशवाणी

- केरल च वायानाड आली जिमीं खिसकने आली घटना च मरोने आलें दी गिनतरी ढाई सौ कोला उप्पर टप्पी गई ऐ।
- उत्तराखंड दे टेहरी जिले च बदल फटने करी दऊं जिंदे दा होआ नुक्सान। केदारनाथ च 200 श्रद्धालु फसी गेदे न।
- दिल्ली च भारी बरखा पौने करी अज्ज सब्बै स्कूल बंद रौहगन।
- वेनीजुएला दे राष्ट्रपति होरें उच्चतम अदालत गी चुनाएं दे नतीजें दा अडिट करने दे प्रमाणित करने दी अपील कीती।
- अमरीकी फेडरल रिजर्व नै ब्याज दर च कोइ बदलाव नेई कीता ऐ ते उसी 5.2—5 ते 5.5 फीसद बिच्च गै रखेआ ऐ। सितम्बर च दर च कटौती करने दी कराई सारत।

<><><><><><>

Wayanad

केरल दे वायानाड जिले च जिमीं धस्सने दी इक बड्डी घटना च मरोने आलें दी गिनतरी ढाई सौ दा आंकड़ा टप्पी गई ऐ। भारती सेना नै दस्सेआ जे फसे दे 179एं जनें गी सुरक्षत थाहरें पजाई दित्ता गेआ ऐ ते वायानाड इलाके थमां चार लोथां बी बरामद कीतियां न। अज्ज बडलै अत्तामाजा, मुंडक्की ते चुड़ालमाला च बचाह कम्म बी शुरू कीता गेआ। खोजी टीमें कन्नै 1 डॉग स्वाड बी तैनात कीता गेदा ऐ। 5 जेसीबीएं गी नाडूएं दे दुए पास्सै मलवा किअ्ठा करने गी भेजेआ गेआ ऐ। कल चिरें रातीं तगर चूड़ालमाला च 190 फुट पुल बनाने दा कम्म चलदा रेआ ते अज्ज दपैहरी मगरा तगर इस कम्मै गी सबूरा करी लैता जाग। इस पुलै दे बनने कन्नै जिमीं खिसकने आली थाहरै तगर सखल्ले राहत पजाई जाई सकोग। केरल दे मुख्यमंत्री पिनाराय विजयन अज्ज वायानाड च जिला कलैक्टरें कन्नै बैठक लांगन।

<><><><><><>

Uttarakand

उत्तराखंड च बद्दल फट्टने करी देहरी जिले दे धनशाली इलाके च दऊं जनें दी मौत होइ गेइ ऐ। राज्य च बड़ी भारी बरखा कारण तबाही मची गेदी ऐ। केदारनाथ दे रस्ते च भीम बाली नाडू कश बद्दल फट्टने करी जिमीं खिसकने करी 25 मीटर सड़कै गी नुक्सान पुज्जा। आरजी तौर पर रस्ता बंद करने करी भीम बाली च 200 श्रद्धालु फसी गेदे न। एसडीआरएफ जिला पुलस ते स्थानीय अधिकारिएं समेत आपात सेवां, मोके पर पुज्जी गेइयां ते फसे दे श्रद्धालुएं गी सुरक्षत थाहरें पजाई दित्ता गेआ ऐ।

<><><><><><>

New Delhi

राष्ट्रीय राजधानी दिल्ली दे मते सारे हिस्से च भारी बरखा होई। इस बरखा करी लोकें गी बड़ी मती गर्मी ते उमस थमां राहत थहोई ऐ। भारी बरखा करी बक्ख-बक्ख इलाकें च पानी किट्ठा होई गेआ ऐ जेह्दे चलदे यातायात प्रभावत होआ ऐ। मौसम विभाग नै अगले 5 दिनें दरान दिल्ली च हल्की थमां दरमेयाने दर्जे दी बरखा पौने दी पेशगोई कीती ऐ। दिल्ली सरकार नै राष्ट्रीय राजधानी दे सारे स्कूलें गी अज्ज भारी बरखा दे चलदे बंद रखने दी घोषणा कीती ऐ।

<><><><><><>

IMD

मौसम विभाग नै अगले 5 दिनें दरान मुख्य दे पूर्व, पच्छम, मध्य, दक्खन प्रायद्वीप ते पूर्वोत्तर क्षेत्रें च बड़ी मती बरखा पौने दा अनुमान जाहर कीता ऐ। विभाग नै आखेआ ऐ जे शनिवार तगर मध्य महाराष्ट्र, मध्य प्रदेश, कोंकण, गोवा ते गुजरात च बी बड़ी मती बरखा पौने दी पेशगोई कीती ऐ। मौसम विभाग नै असम, मेघालय, मणिपुर ते मिजोरम च बी तेज बरखा होई सकदी ऐ। त्रै अगस्त तगर उत्तराखंड, हिमाचल प्रदेश, पंजाब, हरियाणा, चंडीगढ़ ते उत्तर प्रदेश च बी तेज बरखा दी पेशगोई कीती गेई ऐ।

<><><><><><>

Venezuala

उपराज्यपाल मनोज सिन्हा होरें कल श्रीनगर दे पंथा वेनिजुएला दे राष्ट्रपति निकोलस मादुरो होरें उच्चतम अदालत दे चुनां चेम्बर अगगै तारें होए दे राष्ट्रपति चुनाएं दे नतीजें दा अडिट करने ते उनें गी प्रमाणिकता देने दी अपील कीती ऐ तां जे मती शा मती पारदर्शिता जकीनी कीती जाई सकै। श्री मादुरो होरें उच्चतम अदालतै गी इत्त सरबंधै च विशेष तकनीकी सतह दी विशेषज्ञ रायें दे जरियै सादयें ते सब्बने नुक्तें दी तुलना करने लेई बड्डे संस्थानें गी सददने दी अपील कीती। जेहदे संधारें वेनिजुएला दी राष्ट्रीय चुनां परिषद नै श्री मादुरो होरें गी राष्ट्रपति चुनाएं च जेतु घोषत करियै 2025 थमां 2031 बरें तगर 6एं बरें दी त्रीह अवधि लेई हुंदे राष्ट्रपति बनने पर मोहर लाई ही। राष्ट्रपति चुनाएं दे नतीजें पर सोआलिया नशान लांदे होई राजधानीच विशे च प्रदर्शन शुरू होइ गेदे न। ज्हारां बद्धे लोक राष्ट्रपति मादुरो हुंदी जित्त दा विरोध करने लेई सिटी सेंटर च किट्ठे होए।

<><><><><><>

US Fedral

अमरीकी फेडरल रिजर्व नै ब्याज दरें गी 5.2—5 फीसद थमां 5.5 फीसद बश्कार बनाई रखेआ ऐ। एह फैसला मुद्रा स्फीति च लगातार कमी करी लैता गेआ ऐ। बैंक नै सितम्बर च ब्याज दरें च कटौती दी संभावना जाहर कीती ऐ। बैंक दी नीति तैह करने आली संस्था, फेडरल ओपन मार्केट कमेटी नै 2 दिन दी बैठक गी प्रमुख ब्याज दरें गी पैहले आला लेखा गै बनाई रखने दे फैसले कन्नै खत्म कीता। अमरीका दी मुद्रा स्फीति दी दर 2.5 पर आई गेई ऐ ते इसी 2 फीसद पर आनने दा लक्ष्य ऐ।

<><><><><><>

PM Modi

प्रधानमंत्री नरेन्द्र मोदी होर अज्ज नमीं दिल्ली च वियतनाम दे प्रधानमंत्री फाम मिनचिन्ह हुंदे कन्नै गल्लबात करगंन। वियतनाम दे प्रधानमंत्री हुंदा राष्ट्रपति भवन च औपचारिक सुआगत कीता जाग। मगरा ओह राष्ट्रपिता महात्मा गांधी होरें गी श्रद्धांजलि भेंट करने लेई राजघाट जांगन। वियतनाम दे प्रधानमंत्री हुंदा राष्ट्रपति द्रौपदी मुर्मू ते उपराष्ट्रपति जगदीप धनखड़ कन्नै मलाटी करने दा कार्यक्रम ऐ।

वियतनाम दे प्रधानमंत्री होर जंदे रोज भारत पुज्जे हे ते हवाई अड्डे पर उंदा सुआगत विदेश राज्यमंत्री पबित्रा मारगितेरिता होरें कीता। उंदे कन्नै उच्च सतह् दा प्रतिनिधिमंडल जेह्दे च केई सारे मंत्री, कारोबारी नेता शामिल न भारत आए दे न।

<><><><><><>

Indian Cricketer

भारत दे महान क्रिकेटर ते कोच अंशुमन गायकवाड हुंदा काल होई गेआ ऐ। ओह् 71 बरें दे हे ते ओह् कैसर थमां पीड़ित हे। गायकवाड होरें बड़ौदा आस्तै पैहली श्रेणी आले मैच खेडने दे अलावा 1975 थमां 1987 बश्कार भारत आस्तै 40 टैस्ट ते 15 इक रोजा मैच खेड्डे। गायकवाड भारतीय टीम दे चयनकर्ता रेह् ते मगरा अक्तूबर 1997 थमां अक्तूबर 1999 तगर भारत दे मुख्य कोच रेह्।

<><><><><><>

India-Srilanka

मर्दे दे क्रिकेट च अज्ज भारत ते श्रीलंका त्रऊं मैचें दे इक दिवसीय अंतर्राष्ट्रीय मकाबलें तैहत कल कोलंबो दे प्रेमादासा स्टेडियम च पैहला मैच खेड्डेआ जाग। मैच दपैहरी मगरा ढाई बजे शुरू होग। रोहित शर्मा भारती टीम दी अगुवाई करा'रदे न।

<><><><><><>

Paris Olympic

पैरिस ओलंपिक च नशानेबाज स्वापनिल खुसाले मर्दे दी 50 मीटर राइफल 3 पोजिशन शूटिंग प्रतियोगिता च भारत आस्तै त्रिए तगमे दी दावेदारी पेश करगंन, जिसलै के 2 बारी दी विश्व चैंपियन मुक्केबाज निखत जहरीन महिलाएं दी 50 किलोग्राम मुक्केबाजी च तगमा हासल करने दी कोशश करगंन।

<><><><><><>

WMCC Meeting

भारत चीन बन्ने आले मामलें पर सलाह मश्वरा ते तालमेल बनाने सरबंधी डब्ल्यूएमसीसी दी 30मीं बैठक कल नमीं दिल्ली च सम्पन्न होई। बैठक च विदेश मंत्रालय दे संयुक्त सुचिव गौरांग लाल दास होरें भारतीय प्रतिनिधि मंडल दी अगुवाई कीती। चीन दे प्रतिनिधिमंडल दी अगुवाई उत्थुआं दे विदेश मंत्रालय च बन्ने ते महासागर विभाग दे महानिदेशक होग जियांग होरें कीती। विदेश मंत्रालय नै इक ब्यानै च आखेआ ऐ जे दौनें विदेश मंत्रिणं असल नियंत्रण रेखा दी मजूदा स्थिति ते होर दुए बकाया पेदे मुद्दें दा तौले हल तुप्पने दी समीक्षा कीती। ब्यानै च आखेआ गेआ ऐ जे शांति ते स्थिरता ब्हाली ते असल कब्जा रेखा प्रति सम्मान, आपसी सरबंधें च सामान्य स्थिति दी ब्हाली दा लोडचदा आधार ऐ।

<><><><><><>

Amarnath Yatra

29 जून गी शुरू होई दी श्री अमरनाथ जी दी यात्रा पूरी चाल्ली रमानदारी ते बवस्था आले ढंगै सिर जारी ऐ। कश्मीर घाटी च बालटाल ते पहलगाम दौनें रस्तेया श्रद्धालुणं दे पवित्र गुफा लेई ओने जाने दा सिलसिला बरोबर जारी ऐ। ताई जम्मू थमां बीह र रोज यात्रिणं दा जत्था घाटी लेई रवाना होआ'रदा ऐ ते अज्ज बडलै कोई साढे क 3 बजे 1 ज्हार 295 श्रद्धालुणं गी लेइयै इक होर जत्था सख्त सुरक्षा बंदोबस्तें हेठ जम्मू दे भगवती नगर आले "यात्री निवास" थमां 48 गड्डिणं दे काफले च रवाना होआ। जत्थें च 1 ज्हार 66 मर्द, 182 महिला, 42 साधु, 14 साध्वियां ते इक ट्रॉसजेंडर शामिल ऐ। इंदे चा 349 यात्री बालटाल ते 946 पहलगाम आले रस्तेया पवित्र गुफा लेई रवाना होंगन।

<><><><><><>

Samba Infiltration

सांबा जिले च बीएसएफ नै पाकिस्तान कन्ने लगदे अंतर्राष्ट्रीय बन्ने पर इक पाकिस्तानी घुसपैठिए गी मारी मकाया ऐ।

साढ़े जिला संवाददाता सतपाल शर्मा नै जानकारी दित्ती ऐ जे जंदी चिरे रातीं सांबा सेक्टर च खोआरा चौकी कश इक धुसपैठिया भारतीय इलाके च बड़ने दी कोश्ट करा'रदा हा ते भारतीय इलाके च अंदर बड़ी औने पर उसी गोली मारी दित्ती गई। होर ब्योरे गी बलगेआ जा'रदा ऐ।

<><><><><><>